

LOCAL

Pa demostrá union

ASOMA cu reunion general pa eligí directiva y anuncia plannan

ORANJESTAD - Diasabra ASOMA ta organisa un reunion general, cu meta pa eligi un directiva nobo y anuncia plannan cu nan tin.

John Jeandor y Elgin Juddan den declaracion na Bon Dia Aruba a duna di conoce cu e reunion aki lo tuma lugar na Paradise Restaurant pa 2'or di atardi.

Nan ta haci apelacion na tur miembro pa asisti, ya cu e ta di importancia, pero mas ainda pa demonstra union bao di e musiconan.

John Jeandor a bisa cu e plannan ta hopi, pero esaki por ser logra unicamente cu respaldo di e miembronan mes. Un di e promé plan ta pa traha pa yega na nan propio sede.

E lo no ta simplemente un club, pero un sitio unda musiconan por desaroya nan mes mas a fondo riba terreno musical. Otro plan ta pa bini cu seminario, invitando profesionalnan di afo y asina engrandece conocimiento di nos musiconan local, di manera cu nan por representa nos dignamente.

Elgin Juddan ta admiti si cu nos musiconan mester bira mas serio. Tin musico serio, pero tin falta di disciplina y esaki mester ser motiva bao di nos mes hendenan. Mester elimina e impresion den pueblo cu ASOMA tey solamente pa ora di carnaval, pasobra no t'asina.

Encuanto e descontento cu tin en especial bao di

musiconan cu ta toca den hotel, cu ta sinti cu ASOMA no ta haci nada pa nan, te cu nan ta pensa di forma nan propio asociacion, Juddan a splica cu enverdad nan tambe a tende di e intencionnan aki.

Esey tabata motibu cu Jeandor ultimo simannan a cuminsa sondea e hotelnan, pero manera a ser bisa, mas activo e propio miembronan ta, demostra union, incluyendo e musiconan di hotel, lo logra mas pa tur.

Pesey e reunion di Diasabra awor ta asina importante. Critica semper ta bon, contal e ta constructivo, pero hopi biaha loke ta pasa un musico ta pa falta di interes di su banda.

Jeandor a admiti si, cu te

ainda Aruba no tin suficiente musico profesional y mester bai traha riba e terreno aki tambe. Y esey lo ta un di e tareanan di e directiva nobo.

Ex-Presidente

Joy Kock, ex-presidente di ASOMA a sinti cu e forma cu declaracion a ser haci pa e dos personanan, cu tur respet pa nan opinion, tog a demostra degeneracion di loke cu directivanan anterior a haci.

Dies ocho aña pasa, tabata ASOMA cu a funda Academia Musical pa yuda nos musiconan y ta mesun academia aki cu a habri e posibilidad pa yunan di tera por a sigi estudio na Berklee College na Boston.

No por bisa cu direc-

tivanan anterior no a haci nada y cu awor lo bai haci algo. Motibu cu for di 1989 el a cuminsa distancia su mes, ta meramente pa falta di cooperacion di gobierno.

Unda un parlamentario politico, envez di sostene pa musiconan Arubiano haya reconocimiento y por toca den nos hotelnan, e mes ta percura pa musiconan di afo haya permiso pa toca den hotelnan. Asina nunca nos musiconan local lo por haya oportunidad na nan propio pais.

Joy Kock no kier a bai mas den detayes, no mas kier a aclarea, pasobra manera e dos personanan a trece nan punto di vista, ta demostra cu nada a ser haci anteriormente y esey e kier a clarifica. □